



بِسْمِ اللَّهِ الرَّحْمَنِ الرَّحِيمِ

ISLAMSKA ZAJEDNICA BOŠNJAKA U GETEBORGU
ISLAMISKA BOSNAKISKA FÖRSAMLINGEN I GÖTEBORG

**Na osnovu člana 11 Statuta IZBG, Skupština IZBG je na svom zasijedanju,
dana 13. 02. 2010. godine, donijela:**

PRAVILNIK O RADU ISLAMSKE ZAJEDNICE BOŠNJAKA U GETEBORGU

OPĆE ODREDBE

Član 1.

Ovim Pravilnikom uređuje se organizacija i rad Islamske zajednice Bošnjaka u Göteborg-u (u daljem tekstu "Džemat"), njenih organa i imama.

Član 2.

Džemat je sastavni dio Islamske zajednice Bošnjaka u Švedskoj (u daljnjem tekstu: IZBUŠ), koji za njene potrebe obavlja vjerske, administrativno-pravne i finansijske poslove na svom području, a obuhvata teritorij grada Göteborga i okoline. Džemat štiti vjerska prava muslimana i imovinska prava IZBUŠ-a.

Član 3.

Džemat ima svojstvo pravnog lica. U svom radu džemat koristi okrugle pečate promjera: 35mm i 25mm. Sadržinu pečata, njihovu izradu, zamjenu i uništenje određuje Skupština džemata. U svom radu džemat koristi memorandum sa znakom IZBG-a.

Član 4.

U administrativno-pravnim, imovinskim i finansijskim stvarima prema trećim licima, džemat predstavlja i zastupa predsjednik ili blagajnik Izvršnog odbora džemata. U stvarima vjerske prirode i komunikaciji s drugim vjerskim zajednicama i trećim licima, džemat zastupa imam džemata, a u njegovoj odsutnosti lice koje odredi IO.

Član 5.

U slučaju spriječenosti predsjednika ili blagajnika džemata, džemat zastupa zamjenik predsjednika ili sekretar. U složenim imovinsko-pravnim i finansijskim poslovima predsjednik može opunomoćiti stručno lice da zastupa interese džemata.

Član 6.

Džemat funkcioniše preko Skupštine, Izvršnog odbora džemata i drugih organa u skladu sa Statutom IZBG-a.

ORGANI DŽEMATA

Član 7.

Organi Džemata su:

- Skupština džemata,
- Izvršni odbor džemata,
- Komisije.

Član 8.

Rad Skupštine džemata je regulisan Statutom IZBG-a, Pravilnikom o radu organa IZBG-a i Poslovníkom o radu Skupštine IZBG-a.

Član 9.

Izvršni odbor džemata je izvršni organ IZBG-a na svom području. Mandat izvršnog odbora džemata traje dvije (2) godine.

Član 10.

Izvršni odbor džemata broji devet (9) članova i dva (2) rezervna člana. Na izbornu listu za članove Izvršnog odbora predlaže se devet (9) članova. Imam džemata i predsjednik Omladinske organizacije Göteborg su članovi Izvršnog odbora džemata po položaju. Članovi Izvršnog odbora biraju zamjenika predsjednika Izvršnog odbora, sekretara i blagajnika.

Član 11.

Ukoliko član Izvršnog odbora džemata podnese ostavku, ili ukoliko bude razriješen dužnosti, na njegovo mjesto dolazi novi član iz reda rezervnih članova.

Član 12.

Član Izvršnog odbora džemata može i prije isteka mandata biti razriješen dužnosti ukoliko je:

- njegovo ponašanje i rad u suprotnosti s islamskim normama,
- njegov rad suprotan propisima i odlukama organa IZBG-a,
- nemaran u izvršavanju obaveza u organu u koji je izabran,
- zloupotrijebio svoj položaj,
- podnio neopozivu ostavku.

Inicijativu za razriješenje dužnosti člana Izvršnog odbora džemata, iz nekog od razloga navedenih u ovom članu, pokreće predsjednik Izvršnog odbora a za predsjednika Izvršnog odbora džemata inicijativu pokreće Izvršni odbor sa najmanje 1/3 članova u pismenoj formi.

DJELOKRUG RADA DŽEMATA

Član 13.

Izvršni odbor džemata:

- izvršava odluke i sprovodi uputstvo viših organa IZBuS,
- provodi smjernice Skupštine džemata,
- stara se o uvjetima i potrebama vjerskog života na području džemata,
- stara se o organiziranju, održavanju i kontroli mektebske nastave,
- stara se o organiziranju vjerskih svečanosti,
- stara se o radu manjih lokalnih mesdžida i mekteba,
- organizira distribuciju vjerske štampe,
- organizira prikupljanje članarine i drugih priloga za potrebe džemata,
- organizira prikupljanje sredstava za potrebe IZBuŠ i IZ u BiH a to su: zekat, sadekatul-fitr, kurban i druge akcije pokrenute od IZBuŠ-a i IZ-e u BiH,
- vodi evidenciju o imovini džemata i brine se o njoj i njenom pravilnom korištenju za potrebe džemata,
- razmatra i usvaja finansijski izvještaj o radu džemata,
- brine o osiguravanju sredstava za materijalne i finansijske potrebe džemata,
- utvrđuje opis poslova i radno vrijeme imama,
- utvrđuje visinu plate imama u skladu s budžetom i brine o osiguravanju sredstava za njenu isplatu,
- daje prijedloge za postavljanje i razrješenje imama džemata,
- čuva jedinstvenu evidenciju rođenih, vjenčanih i umrlih muslimana na području džemata i o tome izdaje tražene potvrde,
- obavlja i druge poslove koje mu odredi Skupština džemata ili IZBuŠ-a.

Član 14.

Za svoj rad Izvršni odbor džemata odgovoran je Skupštini džemata, kojoj podnosi izvještaj najmanje jedanput godišnje a po potrebi i više puta.

Član 15.

Izvršni odbor džemata radi i svoje odluke donosi na sjednicama. Sjednica Izvršnog odbora se može održati ako sjednici prisustvuje 2/3 izabranih članova, a odluke su valjane ako su donesene većinom glasova prisutnih članova. Izvršni odbor može odlučiti da se odluke o važnijim pitanjima donose usaglašavanjem stavova (konsenzusom). Koje su to odluke koje se donose na način utvrđen u prethodnom stavu utvrđuje Izvršni odbor na prijedlog predsjednika ili imama prilikom ustanovljenja dnevnog reda na sjednici.

Član 16.

Redovne sjednice Izvršnog odbora džamata održavaju se prema potrebi a najmanje jedanput mjesečno. Vanredne sjednice održat će se kada to zatraži najmanje 1/3 članova Izvršnog odbora, predsjednik IO-a, imam džemata, predsjednik ili glavni imam IZBUŠ-a.

Član 17.

Sjednice Izvršnog odbora džemata saziva predsjednik Izvršnog odbora pozivima.

Član 18.

Na sjednicama Izvršnog odbora džemata zapisnik vodi sekretar Izvršnog odbora džemata ili jedan od članova. U zapisnik se obavezno unose podaci koju obuhvataju: mjesto i vrijeme održavanja sjednice, poimenično broj prisutnih kao i broj odsutnih članova Izvršnog odbora, dnevni red sjednice, kratak prikaz diskusija o pojedinim tačkama dnevnog reda i zaključci donešeni na sjednici. Metod i sadržaj rada IO IZBG-a, regulisani su Poslovníkom o radu IO-a.

Član 19.

U administrativnim i pravnim stvarima iz nadležnosti Izvršnog odbora džemata, koje su hitne naravi, a čije bi odlaganje moglo prouzrokovati štetu za džemat ili IZBuŠ-a uopće, predsjednik Izvršnog odbora u konsultaciji sa imamom može donijeti odluku ali je obavezan o tome obavijestiti članove Izvršnog odbora na prvoj narednoj sjednici i zatražiti da se donesena odluka verificira.

Član 20.

U cilju uspješnijeg rješavanja pitanja iz pojedinih oblasti, Izvršni odbor može svojom odlukom formirati stručne komisije, stalne ili povremene, u zavisnosti od karaktera posla koga obavljaju. Odlukom o formiranju komisije iz prethodnog stava utvrđuju se zadaci, vrijeme djelovanja, nadležnosti i naknada za rad komisije.

Član 21.

Pobliži opis poslova i broj izvršilaca radnih zadataka u pojedinim komisijama Izvršni odbor džemata utvrđuje svojom odlukom.

Član 22.

Predsjednik Izvršnog odbora džemata je izabrano lice koji svoju dužnost obavlja počasnó u mandatnom periodu na koji je izabran.

Predsjednik Izvršnog odbora džemata vrši sljedeće poslove:

- rukovodi radom Izvršnog odbora džemata,
- priprema sjednice odbora, saziva ih i predsjedava njihovim radom,
- brine se o izvršavanju odluka Izvršnog odbora i provedenju naloga i uputstava viših organa i ustanova IZBuŠ-a i IZ u BiH,
- zastupa džemat u administrativno-pravnim i finansijskim stvarima prema trećim licima,
- brine se o pravilnom finansijsko-materijalnom poslovanju džemata,
- odobrava odmor i odsustvo imama u džematu,
- brine o zamjeni imama tokom njegova odsustva,
- potpisuje ugovore kojima se za džemat preuzimaju određena prava i obaveze u granicama datih mu ovlaštenja,

- potpisuje sve službene akte koja se upućuju iz džemata osim akata koje potpisuje imam,
- otvara prispjelu poštu i signira je u rad,
- rukovodi izradom nacrtu završnog računa i budžeta džemata,
- obavlja i druge poslove koje mu u datom momentu naloži Izvršni odbor i Skupština džemata.

Član 23.

Sekretar Izvršnog odbora džemata vrši sljedeće poslove:

- obavlja sve administrativno-pravne poslove u džematu,
- vodi knjigu protokola i druge prateće knjige,
- vodi i čuva personalni dosije imama u džematu,
- pomaže predsjedniku u pripremi sjednica Skupštine i Izvršnog odbora džemata i vodi zapisnik na ovim sjednicama,
- vodi evidenciju i čuva dokumentaciju o imovini džemata,
- vodi i čuva arhivu džemata.

Član 24.

Blagajnik Izvršnog odbora džemata vrši sljedeće poslove:

- naplaćuje, isplaćuje gotovinu i čuva novac,
- obračunava i isplaćuje plate i druga primanja imamu,
- ažurno vodi blagajnički dnevnik,
- vodi evidenciju ulaznih i izlaznih faktura,
- brine o pravovremenoj uplati propisanih doprinosa za imama,
- odlaže blagajničku dokumentaciju i brine o njenom čuvanju,
- vodi brigu da gotovinska sredstva u blagajni budu u skladu sa zakonskim maksimumom,
- vodi sve evidencije o finansijskim obavezama trećih lica prema džematu i džemata prema trećim licima,
- obavlja sve druge poslove materijalno-finansijske prirode koje mu stavi u zadatak predsjednik Izvršnog odbora džemata.
- blagajniku pri skupljanju novčanih sredstava pomažu osobe ovlaštene od strane Izvršnog odbora džemata.

Član 25.

U radni odnos na poslove imama u džematu prima se radnik koji ima završenu medresu i fakultet islamskih nauka.

Član 26.

Imama u džematu postavlja, premješta i razriješava Rijaset IZ u BiH na prijedlog Izvršnog odbora džemata i Glavnog imama IZBuŠ-a. Imam džemata zasniva radni odnos sa Izvršnim odborom džemata na temelju dekreta Rijasetu IZ u BiH o vršenju imamsko-hatibske i muallimske dužnosti, na osnovu kojeg se zaključuje ugovor o radu.

Imam džemata obavlja imamsko-hatibske i muallimske poslove u džematu kako slijedi:

- predvodi džemat u džamiji na propisanim namazima,

- vodi matične knjige (umrlih i vjenčanih)
- vrši obrede vjenčanja
- održava predavanja i vazove u džamiji,
- klanja džezaze namaz i obavlja druge obrede umrlim muslimanima,
- radi na popularizovanju i distribuciji islamske štampe koju izdaje ili preporučuje IZBuŠ ili IZ u BiH,
- nosi imamsku uniformu koja je u skladu tradicije Bošnjaka pri obavljanju vjerskih obreda i u svakoj prilici i na svakom mjestu čuva ugled islamskog radnika,
- obavlja imamsku i hatibsku dužnost na džuma-namazu i bajram-namazima,
- priprema se za hutbu u kojoj obrađuje aktuelna pitanja i potstiče svojim obraćanjem muslimane na otklanjanje negativnih pojava i utjecaja na koje u hutbi ukazuje i postavlja tekst iste na web-stranici džemata,
- prati stručnu literaturu u cilju boljeg islamskog obrazovanja i stečena znanja primjenjuje u praksi,
- održava mektebsku nastavu kao i vjeronauku u školi po utvrđenom planu i programu,
- svim pojavama koje utječu na rezultate mektebske nastave i vjeronauke obavještava predsjednika džemata i glavnog imama IZBuŠ-a.
- održava kontakte sa roditeljima djece koja pohađaju vjersku pouku,
- popularizira kod djece novine i druga prigodna izdanja IZBuŠ-a i IZ u BiH i potječe ih na čitanje.
- prati raspored radnog vremena definisan od strane Izvršnog odbora.

Imam prisustvuje radnim sastancima i seminarima koje zakazuje glavni imam IZBuŠ-a.

Član 27.

Imam u džematu odgovara:

- ako ne izvršava dužnosti i radne zadatke i ne pridržava se odluka Izvršnog odbora džemata, IZBuŠ-a i IZ u BiH,
- ako namjerno ili iz krajnje nepažnje prouzrokuje štetu IZBG-a, IZBuŠ-u, IZ u BiH ili trećim licima u toku svog rada ili u vezi s radom.

Član 28.

Povrede radne dužnosti imama mogu biti teže i lakše. Lakše povrede dužnosti imama su:

- učestalo neopravdano kašnjenje na posao,
- prouzrokovanje manje štete,
- neuredno držanje dokumenata i materijala,
- nepravilan odnos prema Izvršnom odboru i Skupštini džemata,
- obavljanje privatnog posla u radnom vremenu i
- drugi lakši oblici povreda normi iz kodeksa ponašanja u džematu, IZBuŠ i IZ u BiH.

Član 29.

Teže povrede dužnosti imama su:

- neizvršavanje, odnosno nesavjesno, neblagovremeno ili nemarno izvršavanje radnih obaveza imama,
- nezakonito raspolaganje sredstvima džemata,
- zloupotreba položaja, odnosno prekoračenje datog ovlaštenja,
- onemogućavanje kontrole od strane nadležnih organa IZBuŠ-a i IZ u BiH,

- izazivanje incidenata, nereda ili tuče na radu i u džematu,
- neopravdano izostajanje s posla,
- predstavljanje IZBG ili neke njene ustanove u zemlji ili inostranstvu suprotno Statutu IZBuŠ i Ustavu IZ u BiH i propisima Ustava IZ u BiH,
- falsifikovanje isprava ili davanje netačnih podataka u cilju obmanjivanja organa džemata i viših organa IZBuŠ-a i IZ u BiH,
- bavljenje poslovima koji nisu u skladu s propisima islama i službom koju obavlja u džematu,
- svaka radnja ili propuštanje radnje na radu ili u vezi s radom koje istovremeno predstavljaju krivično djelo,
- lakše povrede radne dužnosti u ponavljanju,
- samovoljno napuštanje radnog mjesta,
- drugi oblici teže povrede dužnosti ili obaveza na radu.

Član 30.

O disciplinskoj odgovornosti imama odlučuje Izvršni odbor džemata, koji može nakon provedenog disciplinskog postupka izreći jednu od sljedećih mjera:

- opomena,
- prestanak Ugovora o radu.

Član 31.

Imam odgovara ako namjerno ili iz krajnje nepažnje prouzrokuje štetu IZBG ili trećim licima na radu ili u vezi s radom. Postojanje štete, okolnosti pod kojima je ona nastala i odgovornost imama, utvrđuje neposredno Izvršni odbor džemata.

IZVORI FINANSIRANJA DŽEMATA

Član 32.

Izvori finansijskih sredstava džemata su:

- obavezna članarina pripadnika džemata,
- dobrovoljni prilozima,
- prihodi od prigodnih sergija,
- prihodi od pružanja vjerskih i administrativnih usluga u džematu,
- prihodi od procenata zekata, sadekatu-l-fitra i kurbana, utvrđenog odlukom Rijasetu IZ u BiH,
- prihodi od aktiviteta u džematu.

Član 33.

Budžet džemata na prijedlog Izvršnog odbora džemata odobrava Skupština džemata. Budžet se donosi za jednu budžetsku godinu koja traje od 1. januara do 31. decembra. Nalogodavac po budžetu džemata je predsjednik Izvršnog odbora džemata. Budžet se izvršava naplatom prihoda i njihovim trošenjem prema budžetom utvrđenim stavkama. Ako se u toku budžetske godine ukaže potreba za izmjenom budžeta, odluku o tome donosi Skupština džemata na prijedlog Izvršnog odbora džemata vodeći računa da prihodi i rashodi budu

uravnoteženi.

Član 34.

Za naplatu i isplatu finansijskih sredstava u džematu koristi se blok priznanica džemata sa serijskim brojevima.

PRELAZNE I ZAVRŠNE ODREDBE

Član 35.

Izmjene i dopune ovog Pravilnika donosi Skupština džemata na prijedlog IO-a džemata.

Član 36.

Tumačenje odredbi ovog Pravilnika daje Izvršni odbor džemata.

Član 37.

Ovaj pravilnik stupa na snagu danom usvajanja od strane Skupštine džemata.

Član 38.

Danom stupanja na snagu ovog Pravilnika prestaje primjena svih dosadašnjih Pravilnika Skupštine džemata i Izvršnog odbora džemata.

Skupština Islamske zajednice Bošnjaka u Geteborgu

Göteborg, 13. februar 2010 god.